

赤城志卷第二十一

山水門三

山

天台

天台山在縣北三里

自神跡
石起

按陶宏景真誥高一萬

八千丈周回八百里山有八重四面如一十道

志謂之頂對三辰或曰當牛女之分上應台宿

故曰天台一曰大小台以石橋大小得名亦號

桐柏樓山登真隱訣云大小台處五縣中央

五縣

謂餘姚句章臨
海天台剡縣

顧野王輿地志云天台山一名

桐柏衆嶽之最秀者也徐靈府記云天台山與
桐柏接而少異神邕山圖又采浮圖氏說以爲
閭浮震旦國極東處或又號靈越孫綽賦所謂
託靈越以正基是也按諸書名稱不同惟天台
乃其正號餘亦各有據獨上應台宿之語雖本
道書渺不可攷爾魏夫人傳云天台山下有祠
堂方三里乃司命君府其東南二門有日月三
辰之精光燭洞天抱朴子內篇云諸山不可鍊
金丹以其皆有木石之精惟太華少室緡雲羅
浮大小台正神主之可以修鍊審此則其靈敞

詭異出仙入佛爲天下偉觀宜哉

孫綽賦云天台者蓋山嶽

之神秀也涉海則有方丈蓬萊登陸則有四明
天台皆元聖之所游化靈仙之所窟宅夫其峻
極之狀嘉祥之美窮山海之環富盡人神之壯
麗矣所以不列於五嶽闕載於常典者豈不以
所立冥奧其路幽迴或倒景於重溟或匿峯於
千嶺始經魑魅之域卒踐無人之境舉世莫能
登陟王者莫由禋祀故事絕於常編名標於奇
紀然圖象之興豈虛也哉非夫遠寄冥揆篤信
茹芝者焉能輕舉而宅之非夫遺世翫道絕粒
通神者何肯遙想而存之余所以馳神運思晝
咏宵興俛仰之間若已再升者也方解纓絡永
托茲嶺不任吟想之至聊奮藻以散懷
寥廓而無閼運自然之妙有融而爲川瀆結而
爲山阜嗟台嶽之奇挺實神明之所扶持蔭牛
宿以曜峯托靈越以正基結根彌於華岱直指
高於九疑應配天於唐典齊峻極於周詩邈彼
絕域幽邃窈窕近者以守見而不之者以路
絕而莫曉晒夏蟲之疑冰整輕翮而思矯理無

隱而不彰啓二奇以示兆赤城霞起以建標瀑
布飛流以界道睹靈驗而遂徂忽乎吾之將行
仍羽人於丹邱尋不死之福庭苟台嶺之高攀
亦何羨於層城釋域中之常戀暢超然之豪情
被毛褐之森森振金策之鈴鈴披荒榛之蒙龍
涉峭嶸之崢嶸臨濟僧溪而直進落五界而迅征
跨穹窿之垂磴臨萬丈之絕冥踐葶苔之滑石
搏壁立之翠屏攬樛木之長蘿援葛藟之飛莖
雖一冒乎垂堂乃永存乎長生必契誠於幽昧
履重險而逾平旣克濟乎九折路威夷而修通
恣心目之寥爽任緩步之從容藉萋萋之芳艸
映落之長松覲翔鸞之裔裔聽鳴鳳之嗈嗈
過靈溪而濯疎凡想於心胷蕩餘塵於旋流
發五蓋之游蒙追羲農之絕軌踐二老之元蹤
陟降信宿迄於仙都雙闕雲竦以夾路瓊臺中
天以懸居珠閣璣瓏於林間玉堂陰映於高隅
彤雲斐亶以翼樛皦日耀晃於綺疏八桂森挺
以凌霜五芝含秀而晨敷惠風佇芳於陽林醴
泉涌溜於陰渠建木滅景於千尋琪樹璀璨而
垂珠王喬控鶴以沖天應真飛錫以躡虛騁神

轡之揮霍忽出有而入無於是游覽既周體靜
心閒害馬以去世事都捐投刃皆虛日牛無全
疑思幽巖浩咏長川爾乃義和亭午游氣高褰
法鼓琅以振響衆香馥以揚烟肆觀天宗爰集
通仙挹以元王之膏漱以華池之泉散以象外
之說暢以無生之篇悟遣有之不盡覺涉無之
有間泯色空以合跡忽卽有而得元釋二名之
同出消一無於三幡恣語樂以終日等寂默於
不言渾萬象以冥觀兀同體於自然李白送
楊山人詩云客有思天台東行路超忽濤落浙
江秋沙明浦陽月今游方猷楚昨夢先歸越且
盡秉燭歡無辭凌晨發我家小阮賢剖竹赤城
邊詩人多見重官燭未曾然興引登山屐情催
泛海船石橋如可度攜手弄雲烟又同友人舟
行詩云楚臣傷江楓謝客拾海月懷沙去瀟湘
挂席泛溟渤塞予訪前跡獨徃造窮髮古人不
可攀去若浮雲沒願言弄倒景從此鍊真骨華
頂窺絕冥蓬壺望超忽不知青春度但怪綠芳
歇空持釣鼇心從此謝魏闕又有天姥吟畱別
等詩張祐詩云崔嵬海西鎮靈蹟傳萬古羣

峯日來朝累累孫侍祖三茅卽拳石二室猶塊
土傍洞窟神仙中巖宅龍虎名從乾取象位與
坤作輔鸞鶴自相羣前人空若瞽巉巉割秋碧
女媧徒巧補視聽出塵埃處高心漸苦纔登招
手石肘底笑天姥仰看華蓋尖赤日雲上午奔
雷撼深谷下見山脚雨回首望四明轟若城一
堵昏昏晨邈千態恐動非自主控鶴大夢中坐覺
身栩栩東溟子時月卻孕元化毋彭蠡不盈杯
浙江微辨縷石梁屹橫架萬紐青壁豎卻瞰赤
城巔勢來如刀弩盤松國清道九里天莫睹穹
崇上攢三笑兀傍聳五空崖絕凡路癡立麋與
塵邈峻極天門觀深窮地戶金庭路非遠步徙
將欲舉身樂道家流崇儒若一矩行尋白雲叟
禮像登峻字佛窟繚杉楓仙壇半莽莽縣巖與
飛瀑險噴難足俯海眼三井通洞門雙闕壯瓊
臺下昏側手足前採乳但造不死鄉前勞何足
數僧貫休詩云重疊太古色濛濛花雨時好
峯行恐盡流水語相隨黑壤生紅木黃猿頰白
兒因思石橋月曾與道人期陳恬望山詩云
嵩陽不得到華頂可徘徊當知吾性分自有一

天
協寅案我家小阮賢上宜
補題云送從姪之台川

赤城山在縣北六里一名燒山又名消山石皆霞色
望之如雉堞因以爲名孫綽賦所謂赤城霞起
以建標是也山之麓有巖極深廣晉義熙初僧
曇猷造寺號中巖齊僧慧明復就塑一佛故又
名卧佛上又有巖二曰結集曰釋籤蓋灌頂湛
然遺跡也西有玉京洞北有金錢池絕頂有浮
屠七級梁岳陽王妃所建下有曇猷洗腸井大
抵皆峭壁不可登上有仙人井飛流噴沫冬夏
不竭支遁天台山銘序云往天台山當由赤城

爲道而神邕山圖亦以此爲台山南門石城山
爲西門徐靈府小錄又以剡縣金庭觀爲北門

云

瓊臺雙闕兩山自崇道觀西北行二里至元應真人
祠由真人祠取道仙人蹟經龍潭側凡五里至
瓊臺轉南三里至雙闕皆翠壁萬仞森倚相向
孫綽賦所謂雙闕雲竦以夾道瓊臺中天而危

居是也

夏英公竦銘云瓊臺栽薛左右如闕直上相等蘿交蔓結啓閉雲氣出入日月

千里若綫羣峯如屑凌霄壓海吞吳跨越柳
泌題云崖壁盤空大路回白雲行盡到瓊臺洞
門黯黯陰宮閉金闕瞳瞳日殿開方干詩云
積翠千層一徑開遙盤山腹到瓊臺萬花飄落

巖前去桂子流從別洞來石上叢林礙星斗窗
邊瀑布走風雷縱云孤鶴無留滯定恐烟蘿不
放

回

寒石山在縣西北七十里寒山子嘗居之今呼爲寒
巖前有盤石曰宴坐峯上有拊石洞世傳赤城
山神避曇猷徙居此由宴坐西有石如植笋蘿
蔓縈綴其西有石梁可數尺架兩崖間險峻不
可陟南有泉如屋雷寺僧縻竹縵引之前距山
腹一里有道人洞轉西二里亂泉灑流巖竇間
散若虬髯因號龍鬚洞蓋台山絕勝處也臨海
記云石室前有立石參差五色遠望如綬帶舊

傳爲綬帶山產石髓石脂絕杪有仙人石棺蛻

骨尚存嘗有僧就視脰骨幾數尺云寒山詩云重巖我卜

居鳥道絕人跡庭除何所有白雲抱幽石住茲

凡幾年屢見春冬易寄語鐘鼎家虛名定無益

登陟寒山道寒山路不窮溪長石磊磊澗澗

草濛濛苔滑非關雨松鳴不假風誰能超世累

共坐白雲中

瀑布山在縣西四十里山有瀑布垂流千丈遙望如

布蓋與福聖觀國清寺二瀑爲三其山出奇茗

神異記云餘姚人虞洪入山採茗遇一道士引

三青羊至此山曰吾母邱子也聞子善具飲今

以茗奉給祈子他日有甌犧之餘相

遺也後常與家人入山獲大茗焉

覆船山在縣東一十里以狀如覆船故名按神邕山

圖此台山腳也其上夷坦可三十頃中有三泉

冬溫夏冽以其橫據縣東舊呼爲東橫側有古

淨池云許渾有宿東橫山瀨詩云孤舟路漸賒

彌猴垂弱蔓鵲睡橫槎漫向山林宿無人識阮家

方瀛山在縣西北二十八里按徐靈府小錄云由桐

柏北上一峯可五里許上有平疇餘十畝間以

陂池前眺蒼峯後卽雲蓋峯也長慶中靈府居

此寶祿元年賜今名

蒼山在縣東四十里按神邕山圖云其山凌映桐柏

神邕以桐柏在天台極東接寧海界卽非司馬子微今置觀處絕頂睇滄海以

其蒼蒼接漢故名古經云其山鳴吼必有大風
雨

繫船山在縣東四十里地名南洋舊傳古煎鹽處有
石盤柱尚存有巨石橫亙云海波沃日舟人常
繫纜於此然不可攷

鳳凰山在縣東一十里孫綽所謂覲翔鸞之濟濟聽
鳴凰之噤噤意卽此地也

司馬悔山在縣北一十三里天台山後蓋第十六福
地仙人李明治之

始豐山在縣東南一十五里舊以狀類盤龍名龍山

唐天寶中更今名

折山在縣東一十六里以崖堦險折故名中有峯拔

立孤秀舊傳王喬控鶴於此

天柱山在縣西九十里南有黃水峯

羅提刑適詩云孤峯插太清天

桂此垂名造化功成後乾坤賴不傾夜星千拱小秋漢一梁橫欲問登臨處重梯四面生

大盆山在縣西一百八十里西接東陽南界仙居以

遙望形如覆盆故名

鼻山在縣西北一十五里以山形如鼻故名

髻山在縣東四十里以其形如髻故名

土牆山在縣西四十里以形如繚牆故名

峇山在縣西南一十五里

甌山在縣西三十里

檐山在縣西南三十五里

松山在縣東南四十里

招賢山在縣東四十五里

焦山在縣西南六十里

雷馬山在縣西九十里

華頂峯在縣東北六十里蓋天台第八重最高處舊

傳高一萬丈少晴多晦夏有積雪可觀日之出

入中有黃金洞絕頂東望滄海瀰漫無際俗號

望海尖下瞰衆山如龍虎蟠踞旗鼓布列之狀

草木薰郁殆非人世僧智顗與司馬承仁廟御諱嘗

宴坐修真焉孫綽賦所謂陟降信宿迄乎仙都

是也有葛元丹并王羲之墨池李紳題云欲同

瞻華頂禮真壇石標琪木凌天碧水挂銀河映

日寒天外鶴聲隨絳節洞中雲氣隱琅玕浮生

玉霄峯在縣西三十五里洞天宮上重屋疊嶂松竹

蔥蒨且產香茅世號小桐柏焉茅惟宮後者佳

道士多秘惜之皮日休寄題云青冥向上玉

霄峯元始先生戴紫蓉曉案瓊文光洞壑夜壇

香氣惹杉松閒迎仙客來爲鶴靜嘖靈符去是

龍子細捫心無偃骨欲隨師去肯相容陸龜

蒙詩云天台四萬八千丈師在浮雲端掩扉永
夜祇知星斗大深秋猶見海山微風前幾降青
毛節雪後應披白羽衣南望烟霞空再拜欲將飛魄問靈威

五峯在縣北一十里國清寺側其峯有五正北曰八

桂東北曰靈禽東南曰祥雲西南曰靈芝西北

曰映霞前有雙澗合流南注大溪舊志云號天

下四絕之一

按九域志以齊州靈巖澗州棲霞
荆州玉泉并國清爲四絕而神邕

山圖又有益州定慧寺
初無四絕之名姑存之

九峯在縣西北一十五里其峯有九按徐靈府小錄

瀑布寺有峯山蓋白山支榦名九壟唐天寶六

年改今名王羲之與支道林嘗登焉